



BOSNA I HERCEGOVINA
БОСНА И ХЕРЦЕГОВИНА
BOSNIA AND HERZEGOVINA

URED ZA REVIZIJU FINANSIJSKOG POSLOVANJA INSTITUCIJA BiH
URED ZA REVIZIJU FINANSIJSKOG POSLOVANJA INSTITUCIJA BiH
КАНЦЕЛАРИЈА ЗА РЕВИЗИЈУ ФИНАНСИЈСКОГ ПОСЛОВАЊА ИНСТИТУЦИЈА БиХ
AUDIT OFFICE OF THE INSTITUTIONS OF BOSNIA AND HERZEGOVINA



Musala 9, 71 000 Sarajevo, Tel/Fax: ++ 387 (0) 33 26 47 40, www.revizija.gov.ba, e-mail: saibih@bih.net.ba

Broj :

**IZVJEŠTAJ O REVIZIJI
SUDA BiH
ZA 2004. GODINU**

Sarajevo, juni 2005. godine

**SADRŽAJ**

I	MIŠLJENJE REVIZORA	3
II	REVIZIONI IZVJEŠTAJ	4
1.	Uvod	4
2.	Osvrt na preporuke iz prethodne revizije	4
3.	Nalazi i preporuke	4
3.1.	Sistem internih kontrola	4
3.1.1.	Upravljanje i rukovođenje	5
3.1.2.	Planiranje i izvršenje budžeta	5
3.1.3.	Rashodi	7
3.1.4.	Stalna sredstva-popis	7
3.1.5.	Program posebnih namjena	7
3.1.6.	Informacioni sistem	8
4.	KORESPONDENCIJA	8
5.	REZIME	9



I MIŠLJENJE REVIZORA

- 1.1. Ured za reviziju finansijskog poslovanja institucija Bosne i Hercegovine (u daljem tekstu: Ured za reviziju) izvršio je reviziju finansijskih izvještaja i to: Bilansa stanja, Računa prihoda i rashoda, Iskaza o kapitalnim izdacima i Izvještaja o izvršenju budžeta **Suda Bosne i Hercegovine** (u daljem tekstu: Sud) na dan 31.12.2004. godine. Revizija je ispitivala i usaglašenost sa primjenjivim zakonima i funkcionisanje sistema internih kontrola.
- 1.2. Rukovodstvo Suda je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola. Naša odgovornost je da izrazimo mišljenje na osnovu revizije koju smo proveli.
- 1.3. Zakonska utemeljenost revizije sadržana je u Zakonu o reviziji finansijskog poslovanja institucija Bosne i Hercegovine. Reviziju smo obavili u skladu sa revizionim standardima Međunarodne organizacije vrhovnih revizionih institucija – INTOSAI. Ovi standardi zahtijevaju da reviziju planiramo i izvršimo na način koji nam omogućava da se u razumnoj mjeri uvjerimo da su finansijski izvještaji sastavljeni u skladu sa važećom zakonskom regulativom i primjenljivim računovodstvenim standardima i da predstavljaju tačan i istinit prikaz poslovanja. Revizija ocjenjuje i pouzdanost sistema internih kontrola kojima se osigurava primjena zakona i propisa, zaštita imovine, pouzdano izvještavanje i efikasno poslovanje.
- 1.4. Revizija je, na osnovu uzoraka, ispitivala značajne transakcije koje potvrđuju iznose u finansijskim izvještajima, te dala ocjenu računovodstvenih načela prilikom sastavljanja finansijskih izvještaja, procjenu odluka rukovodstva značajnih za sastavljanje finansijskih izvještaja, usaglašenost sa zakonima i propisima, kao i ocjenu sistema internih kontrola. Smatramo da revizija koju smo izvršili pruža razumnu osnovu za izražavanje našeg mišljenja.

Prema našem mišljenju, revidirani finansijski izvještaji za 2004. godinu predstavljaju, u svim značajnijim aspektima, realan i objektivan prikaz stanja na kraju godine, osim za rezervu izraženu u niže navedenim stavkama:

- **Slabost sistema internih kontrola u dijelu koji se odnosi na finansijske aspekte upravljanja i rukovođenja Sudom, bez usvojenog Plana i programa rada Suda za 2004. godinu i drugih internih akata, kao bitnih pretpostavki za uspostavu efikasnog sistema internih kontrola;**
- **Planiranje budžeta nije izvršeno kvalitetno na osnovu raspoloživih i relevantnih parametara, posebno u dijelu planiranja projekata posebnih namjena;**
- **Slabost u informacionom sistemu.**

II REVIZIONI IZVJEŠTAJ

1. Uvod

Zakonom o sudu Bosne i Hercegovine ('Službeni glasnik BiH', br. 29/00, 24/02 i 3/03), osnovan je Sud Bosne i Hercegovine (u daljem tekstu: Sud), sa sjedištem u Sarajevu, s ciljem osiguranja efikasnog ostvarivanja nadležnosti države Bosne i Hercegovine i poštivanja ljudskih prava i vladavine zakona na njenoj teritoriji.

Sud čine predsjednik i određeni broj sudija, kako je to propisano navedenim zakonom. Sud ima svoj budžet, koji je sastavni dio Budžeta institucija Bosne i Hercegovine. Budžet Suda sadrži posebne stavke kojima se preciziraju budžetske potrebe za rad Odjeljenja I za ratne zločine i Odjeljenja II za organizirani kriminal, privredni kriminal i korupciju Krivičnog i Apelacionog odjeljenja.

2. Osvrt na preporuke iz prethodnog izvještaja

Ured za reviziju izvršio je reviziju poslovanja Suda za 2003. godinu o čemu je sastavljen Izvještaj. Revizijom su utvrđene određene nepravilnosti opisane u Izvještaju i Sudu je sugerisano da po istim poduzme određene aktivnosti kako se u daljem poslovanju utvrđene nepravilnosti i propusti ne bi ponavljali. Revizijom Suda za 2004. godinu utvrđeno je kako je u određenim slučajevima postupljeno u skladu sa preporukama Ureda za reviziju, te su uočeni određeni pomaci u finansijskom poslovanju Suda.

Realizovane preporuke: Izvršena je ispravka knjiženja za nabavljena i donirana stalna sredstva iz 2003. godine; izvršen je popis stalnih sredstava i obračun amortizacije na popisana stalna sredstva i, putem ISFU sistema, provedena su odgovarajuća knjiženja u pomoćnim, odnosno u glavnoj knjizi.

Aktivnosti koje su u toku: U toku su aktivnosti oko uspostave Ureda registrara, koji treba da pruži logističku podršku Sudu.

Nerealizovane preporuke: Sistem internih kontrola menadžmenta nije, još uvijek, na zadovoljavajućem nivou, u dijelu koji se odnosi na donošenje neophodnih internih akata, uspostavu efikasne organizacione strukture; planiranje budžeta (naročito kod programa posebnih namjena) nije u potpunosti realizovano u skladu sa preporukama revizije.

3. Nalazi i preporuke

3.1. Sistem internih kontrola

Revizijom finansijskog poslovanja Suda ponovo su ustanovljeni određeni nedostaci u sistemu internih kontrola¹ u dijelu koji se odnosi na:

- finansijske aspekte poslovanja Suda bez usvojenog Plana i programa rada Suda i drugih internih akata (pravila i procedura), značajnih za uspostavu efikasnog sistema internih kontrola i kadrovsku nepopunjenost organizacione strukture pojedinih rukovodećih mjesta, te potrebu proširenja organizacione strukture uvrštavanjem referata o izvršenju krivičnih sankcija, pritvora i drugih mjera;
- Planiranje budžeta nije izvršeno kvalitetno na osnovu realno utvrđenih materijalnih i ljudskih resursa potrebnih za efikasno obavljanje funkcija definisanih zakonom.
- Procedure koje se odnose na funkcionisanje IT sistema, gdje ne postoje jasna zaduženja i raspodjela obaveza i odgovornosti informatičkog osoblja Suda i Tužilaštva i Ureda registrara.

¹ U ranijim izvještajima revizije Sudu je skrenuta pažnja na razumijevanje sistema internih kontrola rukovodstva kao skupa postupaka i mjera koje osiguravaju tačnost i pravilnost evidentiranja finansijskih transakcija, njihovu punu usklađenost za zakonima, te efikasno ekonomično i efektivno trošenje javnog novca.



3.1.1. Upravljanje i rukovođenje

Revizija je ustanovila određene nedostatke u sistemu upravljanja i rukovođenja Suda, u dijelu koji se odnosi na finansijske efekte poslovanja Suda bez usvojenog Plana i program rada za 2004. godinu i drugih neophodnih internih akta, koji čine pretpostavku za uspostavu transparentnog i efikasnog sistema internih kontrola. Ovdje, prvenstveno, mislimo na plan aktivnosti sa jasno definisanim zadacima i ciljevima, interna akta u vezi sa koordinacijom Odjela za računovodstvo i finansije sa drugim odjelima Suda (posebno Odjel I i Odjel II Apelacionog i Krivičnog odjeljenja), uputstva i procedure za nadzor i kontrolu po pravosnažnim presudama sudaca, te skladištenje i čuvanje oduzete robe. Revizija je ustanovila da u Sudu, Pravilnikom o sistematizaciji, nije predviđen referat o izvršenju krivičnih sankcija, pritvora i drugih mjera, iako se Sud, zbog nedostatka skladišnog prostora susreće sa problemom skladištenja i čuvanja značajnih količina robe i stalnih sredstava, oduzetih po izvršnom postupku. Utvrđeno je, također, da nije izvršena kadrovska popunjenost organizacione strukture na značajnim rukovodećim mjestima.

Revizija preporučuje rukovodstvu Sudu da, s ciljem uspostave efikasnog sistema internih kontrola, donese Plan i program rada sa jasno definisanim ciljevima i zadacima i druga neophodna interna akta, te u isti uvrsti referat o izvršenju krivičnih sankcija, pritvora i drugih mjera.

Sud je, u skladu sa propisima², godišnje izvještaje podnosio odvojeno, posebno Informaciju o radu Suda koja se podnosi Parlamentarnoj skupštini i Visokom sudskom i tužilačkom vijeću, a posebno finansijske izvještaje koji se dostavljaju Ministarstvu finansija i trezora. Prema našem mišljenju, ovakav način izvještavanja ne daje potpunu informaciju o finansijskim aspektima poslovanja Suda s obzirom da poslovne aktivnosti nisu povezane sa utrošenim sredstvima.

Revizija preporučuje Sudu da Program rada podnosi na usvajanje uz finansijski plan. Mišljenja smo, također, da bi bilo dobro izmijeniti metodologiju izvještavanja i sačinjavati jedinstvene godišnje izvještaje koji će uz finansijske izvještaje o izvršenju budžeta, odnosno finansijskoj poziciji Suda, sadržavati i izvršene (i neizvršene) aktivnosti Suda tokom godine.

Ovakvim načinom izvještavanja Sud bi prezentovao konkretne komparativne pokazatelje o realizovanim aktivnostima u odnosu na utrošena sredstva za realizaciju tih aktivnosti.

3.1.2. Planiranje i izvršenje budžeta

Prijedlog budžeta Suda sačinjen je na bazi pune sistematizacije sa 80 zaposlenih, u ukupnom iznosu od **5.230.094 KM** i to: za tekuće izdatke iznos od **4.783.294 KM** i za programe posebne namjene 'Međunarodna saradnja' iznos od **446.800 KM**. Ministarstvo finansija i trezora BiH je, bez prethodnih konsultacija sa rukovodstvom Suda, izvršilo umanjjenje budžeta Suda tako da je isti odobren za planirani broj od 44 zaposlena, u ukupnom iznosu od **3.274.640 KM** i to: tekući izdaci u iznosu od **2.774.640 KM** i programi posebne namjene u ukupnom iznosu od **500.000. KM**. Na zahtjev Suda, a kao posljedica ovakvog načina utvrđivanja budžeta Sudu je, u okviru budžeta, odobreno restrukturiranje rashoda u ukupnom iznosu od **258.000 KM**. Struktura restrukturiranih rashoda prikazana je u tabeli Pregled izvršenja budžeta za 2004. godinu.

Ostvareni ukupni rashodi Suda za 2004. godinu iznosili su **2.816.894 KM** ili 457.476 KM manje od plana. U strukturi ostvarenih rashoda najveću stavku čine tekući izdaci u iznosu od **2.692.867 KM**.

² Zakon o izvršenju budžeta institucija Bosne i Hercegovine i međunarodnih obaveza Bosne i Hercegovine za 2004. godinu i Zakon o sudu Bosne i Hercegovine.



Pregled izvršenja budžeta Suda za 2004. godinu je u tabelarno prikazan.

PREGLED IZVRŠENJA BUDŽETA ZA 2004. godinu

Tabela br. 1.

Iznosi u KM

Red. broj	Vrsta Rashoda	Prijedlog budžeta za 2004.god.	Odobreni budžet za 2004.god.	Promjena strukture budžeta	Ukupno budžet (4+5)	Izvršenje Budžeta 2004.	Odstupanje (6-7)	Indeks 7/6
1	2	3	4	5	6	7	8	9
I	Tekući izdaci	4.783.294	2.774.640	0	2.774.640	2.692.867	110.746	97
1	Plaće zaposlenih	3.363.789	1.763.800	+125.000	1.888.800	1.874.267	14.533	99
2	Naknade troš.zaposl. i skupšt.posl.	460.608	333.840	-125.000	208.840	197.222	11.618	94
3	Putni troškovi	57.655	57.000	-20.000	37.000	24.160	12.840	65
4	Izdaci za energiju	87.191	85.000	-10.000	75.000	72.530	2.470	97
5	Izdaci za komunalne usluge	130.817	120.000	-20.000	100.000	91.804	8.196	92
6	Nabavka materijala	108.819	100.000	-30.000	70.000	64.636	5.364	92
7	Izdaci za usluge prijevoza i goriva	42.355	40.000	-20.000	20.000	10.577	9.423	53
8	Unajmljivanje imovine i opreme	30.200	20.000	-13.000	7.000	4.528	2.472	65
9	Izdaci za tekuće održavanje	41.934	42.000	-20.000	22.000	12.634	9.366	57
10	Izdaci za osiguranje	23.926	12.000	0	12.000	6.697	5.303	56
11	Ugovorene usluge	436.000	201.000	+133.000	334.000	333.812	188	100
II	Tekući grantovi	0	0	0	0	0	0	0
III	Kapitalni izdaci	0	0	0	0	0	0	0
1	Nabavka građevina	0	0	0	0	0	0	0
2	Nabavka opreme	0	0	0	0	0	0	0
3	Nabavka ostalih stalnih sredstava	0	0	0	0	0	0	0
IV	Programi posebne namjene	446.800	500.000	0	500.000	124.027	375.973	25
1	Međunarodna saradnja	446.800	200.000	0	200.000	124.027	75.973	62
2	Odjel za ratne zločine	0	300.000		300.000	0	300.000	0
V	UKUPNO (I-IV)	5.230.094	3.274.640	0	3.274.640	2.816.894	457.476	86
VI	Broj zaposlenih	80	44	0	52	52	8	118

Analizom predloženog, odobrenog i ostvarenog budžeta i uvidom u raspoloživu dokumentaciju utvrdili smo da Sud nije prekoračio pojedine budžetske pozicije kao ni ukupan budžet, ali da postoje slabosti u planiranju budžeta koje se odnose na značajno odstupanje odobrenog od predloženog budžeta kako u planiranom broju zaposlenih tako i u nominalnim iznosima po pojedinoj budžetskoj poziciji. Utvrđeno je, također, da je u okviru ukupnog restrukturiranja rashoda, Ministarstvo finansija i trezora odobrilo restrukturiranje rashoda u korist budžetske stavke 'Plaće zaposlenih', što nije u skladu sa Zakonom o izvršenju budžeta institucija BiH i međunarodnih obaveza BiH za 2004.g.

Praćenje izvršenja budžeta vrši se putem ISFU sistema (Izveštaj–Analiza raspoloživih sredstava) što, po našem mišljenju, nije dovoljno, s obzirom da navedeni izvještaj pruža podatke o operativnom budžetu tokom godine, ali ne i podatke o raspoloživom budžetu do kraja godine, te da se sravnjenje sa Ministarstvom finansija i trezora, koje za Sud vrši unos podataka u ISFU, ne vrši redovno.

Sugeriramo rukovodstvu Suda da, ubuduće, budžet planira na osnovu raspoloživih i relevantnih ulaznih parametara. S obzirom da je kvalitetno planiranje budžeta, kao strateški važna osnova za osiguranje materijalnih i ljudskih resursa, veoma značajno za ekonomično i transparentno upravljanje sredstvima, predlažemo da se o budžetu i njegovom izvršenju raspravlja i na sjednicama Suda.

Potrebno je, također, uložiti dodatne napore i poboljšati komunikaciju sa Ministarstvom finansija i trezora BiH, te usaglasiti stavke na kojima će se eventualno umanjeње plana budžeta izvršiti.

3.1.3. Rashodi

Na osnovu Odluke predsjednika Suda broj SU: 489/04 od 03.09. 2004., članovima Konkursne komisije isplaćena je jednokratna naknada u iznosu od po 600,00 KM. Ustanovljeno je da Sud nema usvojene kriterije za isplatu naknada ove vrste (naknade za rad u komisijama, stimulacije) kojima se uslovi za ostvarivanje prava na isplatu naknade, način utvrđivanja visine /iznosa naknade i slično definišu.

Preporučujemo Sudu da, u skladu sa važećim propisima, definiše kriterije kako bi se osigurala transparentnost i jednakopravnost svih zaposlenih.

Kontrolom budžetske pozicije 'Ugovorene usluge', revizija je utvrdila da su troškovi svjedoka u sudskim procesima knjiženi na dvije vrste troškova i to: 'Ostale nespomenute usluge i dadžbine' (do oktobra 2004.g.) i 'Ostale naknade putnih i drugih troškova'. Razlog za ovakav način evidentiranja troškova je nedostatak sredstava na budžetskoj poziciji 'Ugovorene usluge', koja bi bila prekoračena za iznos dijela troškova koji su knjiženi na konto grupe 'Putni troškovi'. Ova praksa nije u skladu sa računovodstvenim načelima i pravilima, a posljedica je slabosti sistema internih kontrola u procesu planiranja i izvršenja budžeta i ima uticaja na objektivnost prikaza utrošaka sredstava po vrsti i namjeni.

Revizija preporučuje Sudu da planiranju i evidentiranju navedene budžetske pozicije (koja predstavlja značajan iznos u materijalnim troškovima Suda), posveti više pažnje i istu, kao i ostale finansijske transakcije, evidentira na odgovarajući analitički konto, u skladu sa propisanim kontnim planom i računovodstvenim standardima i načelima

3.1.4. Stalna sredstva

Provjerom izvršenog popisa sredstava i izvora sredstava sa 31.12.2004. godine, utvrđeno je da je popis izvršen u skladu sa Instrukcijom o popisu za 2004. godinu koju je dostavilo Ministarstvo finansija i trezora BiH, te drugim važećim propisima koji popis definišu. Međutim, nakon preseljenja u nove prostorije (početkom 2005. godine) nije izvršeno ponovno spravnjenje stalnih sredstava sa izvršenim popisom. Dodatni rizik od eventualnog miješanja ili pozajmljivanja sredstava predstavlja činjenica da su u istoj zgradi smještene još tri neovisne institucije.

Revizija preporučuje Sudu da, nakon završenog smještaja, provede vanredni - ponovni popis, u skladu sa propisima koji ovu oblast definišu, a s ciljem efikasnog i tačnog popisa za narednu godinu.

3.1.5. Programi posebnih namjena

Na budžetskoj poziciji 'Programi posebne namjene' odobrena su sredstva u iznosu od 500.000 KM (200.000 KM 'Međunarodna saradnja' i 300.000 KM 'Odjel za ratne zločine'). Projekat 'Odsjek za ratne zločine' je odobren u iznosu od 300.000 KM, ali nije realizovan.

Analizirajući finansijski aspekt programa posebnih namjena 'Međunarodna saradnja' uočili smo određene slabosti i nesklad između traženog, odobrenog i izvršenog budžeta. Tako je za navedeni projekat tražen iznos od 446.000 KM, odobreno 200.000 KM, a realizovano 146.000 KM. Utvrdili smo također, da su uz suglasnost Ministarstva finansija i trezora kroz projekat realizovani kapitalni izdaci u iznosu od 47.000 KM, iako redovnim budžetom Suda navedena sredstva ove namjene nisu odobrena.

Na projektu je izvršeno i restrukturiranje budžeta u iznosu od 61.000 KM, tako što je povećana budžetska pozicija 'ugovorene usluge', a smanjene pozicije 'tekući izdaci'. Projekti su u budžetu odobreni u jednom iznosu, bez analitičke strukture troškova, što praćenje u skladu sa namjenom umnogome otežava.

Revizija preporučuje da se planiranju i izvršenju budžeta projekata posveti više pažnje, uzimajući u obzir stvarno potrebne resurse za obavljanje planiranih aktivnosti. Ovakav način povezivanja planiranih aktivnosti i finansijskih sredstava značajan je i sa aspekta pravilnog izvještavanja o izvršenim aktivnostima i postignutim rezultatima projekta.

3.1.6. Informacioni sistem

Ured registrara je uspostavio informatičko-komunikacionu infrastrukturu pomoću koje će biti povezani informacioni sistemi Suda i Tužilaštva. Predviđena je jedinstvena kontrolna funkcija i zajednički server nad kojim će nadzor i upravljanje vršiti osoblje Ureda registrara. Revizija je utvrdila da ne postoje jasna zaduženja i raspodjela obaveza i odgovornosti informatičkog osoblja Suda i Tužilaštva i Ureda registrara.

Radi bolje organizacije i efikasnosti u poslovanju potrebno je izvršiti jasnu sistematizaciju radnih mjesta sa precizno definisanim obavezama i odgovornostima svih zaposlenih, koje će odgovarati specifičnostima posla i sposobnostima zaposlenih.

U narednom periodu očekuje se uvođenje softverskih aplikacija i baza podataka u institucije Suda BiH i Tužilaštva, čime bi se umnogome poboljšala efikasnost osnovnih poslovnih funkcija. Utvrđeno je da još uvijek nije izvršena sistemska analiza potreba kao preduslov kreiranja novih softverskih aplikacija.

Ured za reviziju preporučuje da se izvrši detaljna analiza potreba i specifičnih zahtjeva koje postoje u pravosudnim institucijama, kako ne bi bilo većih odstupanja nakon implementacije softverskih rješenja, čime bi se cijena greške drastično povećala.

Ured za reviziju je utvrdio da Sud i Tužilaštvo nemaju kreirane interne akte i procedure za korištenje informacionih sistema, te im se ovom prilikom preporučuje donošenje spomenutih procedura, i njihovo distribuiranje svim korisnicima sistema.

4. KORESPONDENCIJA

Sudu je 05.05.2005. godine uručen Nacrt izvještaja o obavljenoj reviziji za 2004. godinu, na razmatranje i dostavljanje eventualnih novih dokaza i primjedbi na nalaze revizije. Sud je 27.05.2005. godine dostavio komentare na Izvještaj o izvršenoj reviziji za 2004. godinu. U odgovoru na revizijski Izvještaj ne navode se novi dokazi koje revizija nije imala na uvid prilikom sačinjavanja Izvještaja i izražavanja mišljenja o obavljenoj reviziji.



5. Rezime

Ured za reviziju je izvršio reviziju finansijskog poslovanja Suda u skladu sa Zakonom o reviziji i INTOSAI standardima, uvažavajući opšte uslove okruženja u kojem Sud funkcioniše. Revizija je utvrdila određeni broj nepravilnosti i nedostataka:

- Slabosti u sistemu internih kontrola u dijelu rukovođenja bez plana i programa rada i nepotpune implementacije organizacione strukture (tačka 3.1.1) ;
- Proces planiranja i izvršenja budžeta nije zasnovan na svim potrebnim i relevantnim ulaznim parametrima (tačka 3.1.2);
- Kontrolom budžetske pozicije Ugovorene usluge, utvrđeno je da su troškovi svjedoka u sudskim procesima knjiženi na dvije vrste troškova i to: 'Ostale nespomenute usluge i dadžbine' (do oktobra 2004.g.) i 'Ostale naknade putnih i drugih troškova', što nije u skladu sa računovodstvenim standardima i usvojenim kontnim planom (tačka 3.1.3);
- Slabosti u planiranju budžeta programa posebnih namjena i praćenju izvršenja u skladu sa namjenom odobrenih sredstava (tačka 3.1.5.);
- IT sistem nije organizovan na zadovoljavajući način, ne postoje jasna zaduženja i raspodjela obaveza i odgovornosti informatičkog osoblja Suda i Tužilaštva i Ureda registrara (točka 3.1.6.).

**ZAMJENIK GENERALNOG
REVIZORA**

Samir Mušović

GENERALNI REVIZOR

Milenko Šego

**ZAMJENIK GENERALNOG
REVIZORA**

Dragan Kulina